

Ажойиб ҳозиржавоблик

10:19 / 27.03.2017 3502

Бир киши Мутанаббини хижолат қилмоқчи бўлиб: “Узоқдан кўриб, мен сизни аёл киши деб ўйлабман?”, дебди.

Мутанабби: “Мен эса узоқдан сизни эркак деб ўйлабман”, деб жавоб берибди.

Британиянинг семиз вазири Черчилл озғин Бернард Шоуга: “Сизни кўрганлар Бринтанияда озиқ-овқат тақчил экан, деб ўйлаб қолади”, дебди.

Бернард Шоу: “Сизни кўрганлар эса тақчилликнинг сабабини билиб олишади”, деб жавоб берибди.

Абул Ғусн Дужайн Жухо қишлоқлардан бирига кириб келаётган экан бир киши унга: “Эй Жухо, сени эшагингдан танибман”, дебди.

Жухо: “Эшак эшакни танийди-да”, деб жавоб берибди.

Бир киши бир аёлга: “Бунча ҳам чиройлисиз?!” , дебди.

Аёл: “Агар сиз ҳам чиройли бўлганингизда мен ҳам сизга худди шу сўзни айтган бўлар эдим”, дебди.

У киши: “Ҳечқиси йўқ, сиз ҳам менга ўхшаб ёлғондан айтиб қўяверинг”, дебди.

Бир аёл тўртта хўтикни ҳайдаб кетаётган эди, унинг олдидан икки йигит ўтиб қолди ва: “Хайрли тонг, эй хўтикларнинг онаси”, дейишибди.

Аёл дарҳол: “Хайрли тонг, болаларим”, деб жавоб берибди.

Бир йигит бели камондек букилиб қолган қарияни кўриб: “Амаки камон неча пул?”, деб масхара қилибди.

Қария: “Аллоҳ умрингни узоқ қилса, текинга оласан”, деб жавоб берибди.

Бир аъробий амирнинг ҳузурида очкўзлик билан қўзичоқ гўштини еётган экан, амир унга: “Нега бунақа еяпсан, қўзичоқнинг онаси сени сузганмиди?”, дебди.

Аъробий: “Қўзичоққа бунча раҳмингиз келмаса, нима, онаси сизни эмизганмиди?”, дебди.

Қудратуллоҳ Сидиқметов таржимаси